


欽定古今圖書集成/博物彙編/藝術典/第 430卷



以2024年12月26日从维基文库导出



欽定古今圖書集成博物彙編藝術典

第四百三十卷目錄

醫部彙考四百十

小兒初生諸疾門四

單方

鍼灸

醫案

藝術典第四百三十卷

醫部彙考四百十醫部彙考四 百十

小兒初生諸疾門四小兒初生諸疾門四

單方單方

小兒初生，不能發聲，謂之「夢生。」庸俗不知此理，遂棄而不救，極為可憫。今凡有此，切不可斷臍帶，將胞衣用火燒炙，令火氣入兒腹內。兒身已煖，卻取貓一隻，用青衣包裹其頭足，令一乖覺。婦人拿住，用貓頭在兒耳邊，卻以手捉住貓頭，婦人以口齒著力咬破貓耳，貓遂大叫一聲，孩兒即醒。開口發聲，眼開，遂得長生矣。 體仁彙編

初生不啼，取冷水灌之，外以蔥白莖鞭之，即啼。

全幼心鑑 小兒胎毒：淡豉煎濃汁，與三五口，

其毒自下。又能助脾氣，消乳食。 聖惠方

預解胎毒七八月或三伏日，或中秋日，剪壺盧鬚如環子腳者，陰乾，於除夜煎湯浴小兒，則可免出痘。

唐璠《經驗方》：

初生胎毒，小兒落地時，用橄欖一箇燒研，砂硃末五分和勻，嚼生脂麻一口，吐唾和藥，絹包如棗核大，安兒口中，待啞一個時頃，方可與乳。此藥取下腸胃穢

毒，令兒少疾，及出痘稀少也。 孫氏集效方

小兒胎毒初生時，以韭汁少許灌之，即吐出惡水惡血，永無諸疾。 四聲本草

初生解毒「小兒初生，未可便與朱砂蜜，只以甘草一指節長炙碎，以水二合，煮取一合，以綿染點兒口中，可與一蜆殼，當吐出胸中惡汁，此後待兒飢渴更與

之，令兒智慧無病，出痘稀少。」 王璆選方

小兒初生六日，解胎毒，溫腸胃，壯氣血：朱砂豆大，細研，蜜丸一棗大，調與吮之，一日令盡。 姚和眾

至寶方 小兒臍風：用壁虎後半截，焙為末，男用女乳，女用男乳調勻，入稀雞屎少許，摻舌根及牙關，仍以手蘸摩兒，取汗出，甚妙。 筆峰雜興方

小兒臍風撮口：艾葉燒灰填臍中，以帛縛定，效。或隔蒜灸之，候口中有艾氣，立效。 簡便方

治臍風爛瘡用「紅綿燒灰、黃牛糞燒灰、乾臙脂各五分，如濕乾敷，乾則清油調之。」 衛生總微

小兒臍爛成風：杏仁去皮研傅。 子母祕錄下同 小兒臍風濕腫，久不瘥者，蜂房燒末傅之，效。

小兒撮口：用硃砂末安小瓶內，捕活蠍虎一箇，入瓶中，食砂末月餘，待體赤陰乾為末。每次薄荷湯服三

四分。 [方廣附餘](#)

《小兒撮口》：初生豆牙，研爛絞汁，和乳灌少許，良。 [普濟方](#) 小兒撮口臍風，乃胎熱也，用蝸牛五枚，去殼研汁塗口，取效乃止。 [本草綱目下同](#)

又，用蝸牛十枚，去殼研爛，入蒔蘿末半分，研勻塗之，取效甚良。

小兒初生，忽患撮口，不飲乳，名曰「馬牙」，不治則百無一生。便看兒齒齦上，有小泡子如粟米狀，急以針挑出血，用墨磨薄荷汁，斷母髮少許，裹手指塗

搽。 [證治準繩](#) 初生撮口，急視口中上下斷間，若有白色如豆大許，便以指甲於當中掐之，於掐破處，以蜈蚣末傅之，大良。 [衛生總微下同](#)

又，「以蛇蛻、硃砂、麝香各一分，每用半字，津調塗口中，日五七次。」

又：「以夜合花枝濃煎汁，拭口并洗。」

又，于兒口傍，先刺令見血，碎雀甕汁塗之。

又，生搗鼠婦，并雀甕汁相和調，塗抹口中，漸漸乳，得效。鼠婦乃濕生虫也。

又以生甘草一分，細剉，水一盞，煎至六分，去滓放溫，分數次灌兒口中，令吐出痰涎穢物，後取豬乳汁點兒口中，差。亦治撮口。

又「以真牛黃少許，研細，淡竹瀝調一字灌之，次以豬乳滴口中。」

又以「赤足蜈蚣，去頭足，炙黃為末，以豬乳調半錢，分三四次溫灌之。」

《一方》：「同雀甕不開口者五枚，燒灰研細末，米飲調服一字。」

又，以「白殭蠶二枚為末，蜜和，傅兒口內。如無，以原蠶蛾二枚炙黃代之。亦治撮口。」

又，以雀矢白，水和圓麻子大乳服二圓，雞矢白亦佳。一方「雞矢白棗大，綿裹，水五合，煮二沸，分服。」

治小兒臍風撮口用「全蠍二十箇，頭尾俱全者，要去毒，用好酒塗炙為末」，麝香一字，另研，共為細末，用半字，金銀煎湯調服，即效。

小兒口噤中風，不能乳，用雀屎水丸麻子大，飲下二丸即愈。或用雀屎四枚為末，著乳頭飲兒，兒大十枚。

千金方下同

小兒口噤面赤者屬心，白者屬肺：用雞矢白如棗大，綿裹，以水一合煮，分二服。一方酒研服之。

小兒百日內風噤，口中有物如蝸牛，或如黃頭白蟲者，薄豬肪擦之即消。 [聖惠方下同](#)

小兒初生口噤，十日內者，用牛口齧草絞汁灌之。小兒口噤，驚風不乳，白棘燒末，水服一錢。

小兒口噤，病在咽中，如麻豆許，令兒吐沫，不能乳食：葛蔓燒灰一字，和乳汁點之，即瘥。

治小兒口噤體熱。以青竹茹三兩。酢一升。煎取三分之一。溫分數服。 [衛生總微下同](#)

治小兒口噤，牙關不開「天南星一箇煨熟，急用紙封角，莫令透氣，卻以紙裹近上尖處剪一竅子，雞頭大，令熱氣出于鼻孔中熏之，牙關立開。」亦治撮口 治小兒口噤不開用天南星去皮臍，研為細末，龍腦少許和勻，將藥於牙根上搽之即好。

又：「用蟬蛻十四。」^个去頭足全蠍十四。^个去頭足，同為細末。入輕粉少許和勻，用乳汁調服。

治初生兒口噤不開，不收乳，以鹿角粉、大豆等分研細，乳和塗乳上，與兒吮之。

小兒初生不乳，咽中有噤物如麻豆許，用水銀米粒大與之，下咽即愈。 [聖惠方下同](#)

小兒口噤，身熱，吐沫不能乳，取東行牛口中涎沫，塗口中及頤上，自愈。

百日內小兒無故口青，不飲乳，用「凌霄花、大藍葉、硃砂、大黃等分為末，以羊髓和丸梧子大。」每研一丸，以乳送下，便可吃乳。熱者可服，寒者勿服。

普濟方 小兒初生不乳：用好乳一酒鍾，蔥白三寸，入銀器內煎滾服之，不用蔥。如無銀器，瓦器亦可。
窮鄉便方 小兒初生，不肯食乳者，乃心熱也。蔥煎乳汁，令小兒服之亦妙。終不若用黃連三分煎湯一分，灌小兒數匙，即食乳矣，神效。 **石室祕**

錄

襁褓中風：取驢前交脊中毛，一拇指大，入麝香豆許，以乳汁和，銅器慢慢炒為末，乳汁和灌之。 **千金**

方 小兒胎癩：琥珀、硃砂各少許，全蠍一枚為末，麥門冬湯調一字服。 **直指方**下同

小兒胎驚：「琥珀、防風各一錢，硃砂半錢，為末，豬乳調一字，入口中最妙。」

小兒胎驚：硃砂、雄黃各等分為末。取少許，豬乳汁調抹口中即效。入麝香少許尤妙。 丹溪

小兒胎驚：蠍一枚，薄荷葉包炙為末，入硃砂、麝香少許，麥門冬煎湯調下一字效。 湯氏寶書

小兒百日發驚：蚱蟬去翅足炙，三分赤芍藥一分黃芩三分，水二盞，煎一盞，溫服。 聖惠方

初生兒驚，月內驚風欲死。硃砂新汲水塗五心最驗。
斗門方

小兒胎風，手足搐搦：用「蚤休」，即紫河車為末，每服半錢，冷水下。 衛生易簡方

治臍濕用枯礬、龍骨為末，入麝少許，拭臍乾用，避風。 顛頤經下同 又用乾蝦蟆、牡蠣各一枚，燒灰細研，少許傅臍中，日三兩上，瘥。

氣臍大如栗，虛腫而軟痛，用竹瀝塗，日數上消。兒臍濕淹，破屋爛草為末，頻搽效。

小兒臍瘡：用乾蝦蟆灰傅，日三四，佳。 肘後

方

小兒臍瘡出血及膿海，蝶蛸、臙脂為末，油調搽之。

聖惠 方下同

小兒臍瘡，用龍骨煨研傅之，效。小兒臍腫，出汁不止，白礬燒灰傅之。

小兒臍濕，不早治，成臍風，或腫赤，或出水，川當歸末傅之。

一入麝香少許。

一用胡粉等分，試之最驗。若愈後，因尿入復作，再傅即愈。

治小兒臍中生瘡，桑汁傅乳上，使兒飲之。 千金方下

同 又：「飲殺羊乳及血。」

治小兒風。臍作惡瘡。歷年不瘥。取東壁上土傅之。大佳。若汁不止。燒蒼耳子粉之。

又：用乾蟻螬蟲末粉之，不過四五度瘥。

小兒臍不合，取車轄脂燒灰，日一傅之。

又：「燒蜂房灰為末，傅之。」

小兒臍中生瘡，燒甌帶灰和豬膏傅之。

小兒臍赤腫：杏仁半兩，豬頰車髓十八銖，先研杏仁如脂，和髓傅臍中腫上。

小兒臍瘡久不瘥者，馬齒菜燒研傅之。

小兒臍腫：「荊芥煎湯洗淨，以煨蔥刮薄，出火毒，貼之即消。」

海上方

小兒臍瘡出汁久不瘥：蝦蟆

燒末傅之，日三，甚驗。一加牡蠣等分。

外臺

小兒臍汁出赤腫：白石脂末熬溫撲之，日三度，勿揭動。

韋宙獨行方

嬰兒臍腫，多因傷濕，桂心灸熱熨之，日四五次。

姚和眾方

小兒臍瘡久不合者，黃蘗末塗之。

子母祕錄

初生小兒臍汁不乾，用綿繭、亂髮燒灰掩之。 窮鄉

便方下同 小兒肚臍突出，用原斷臍帶并艾葉同燒灰，以油胭脂調搽即安。

小兒臍汁不乾，用綿裹落下臍帶燒研一錢，入當歸頭末一錢，麝香一字摻之。 全幼心鑑

小兒斷臍，即用清油調髮灰傅之。不可傷水，臍濕不乾，亦傅之。 本草綱目

治小兒初生。臍未落時。腫痛水出。取「故緋絹燒灰。研細末傅之。」 衛生總微下同

又，「以綿燒灰，研為細末，傅之，新舊皆可。」

小兒肚臍突出半寸許，此氣旺不收也。若不急安之，往往變為角弓反張。方用茯苓一錢車前子一錢甘草二分陳皮三分通草三分如無通草，燈心一團共煎湯灌

之，一劑即安，《神方》也。 石室祕錄下同 小兒初生，臍汁不乾：用車前子炒焦，為細末，傅之即乾，神效。

初生小兒胎熱或身體黃者，以真牛黃一豆大，入蜜調膏，乳汁化開，時時滴兒口中。形色不實者，勿多服。

錢氏小兒方

初生小兒五七日有熱證，不得已，只以「益元散」時時灌之。 傷寒心鏡

小兒胎熱：黑豆二錢，甘草一錢，入燈心七寸，淡竹葉一片，水煎。 全幼心鑑下同

小兒初生七八日，大小便血出，乃熱傳心肺，不可服涼藥，只以生地黃汁五七匙，酒半匙，蜜半匙和服。小兒初生無皮，色赤，但有紅筋，乃受胎未足也，用早白米粉撲之，肌膚自生。 聖濟方

小兒初生。遍身如魚脬。又如水晶，破則成水流。以密陀僧生研搗之，仍服蘇合香丸。 救急方

治兒初生兒血凝皮肉不斂，哭無聲，不吮乳，以胡粉研細，酒和塗之，乾即再塗。 衛生總微下同

又「以白殭蠶為末，煎湯，適寒溫浴之。」

小兒胎寒好啼，晝夜不止，因此成癩：當歸末一小豆大，以乳汁灌之，日夜三四度。 肘後方

小兒胎寒，腹痛汗出，用衣中白魚二七枚，絹包，于兒腹上回轉摩之，以愈為度。 [聖惠方](#)

治小兒忽患腹痛，天矯汗出，名曰「胎寒。」煮梨葉濃汁七合，可三四度飲之。 [千金方](#)

小兒初生，貼額頭熱鼻寒者，天南星炮為末，水調貼額上，炙手熨之。 [危氏得效方](#) 小兒初生，面青身冷口噤，乃胎寒也。用白殭蠶、木香、肉桂、陳皮、檳榔、甘草炙各五分，水煎取汁，以綿蘸入兒口中。

入門

又「以當歸為末，每用一小豆許，乳汁調下，日二夜一，兒大添之。」 [衛生總微下同](#)

又「以柏子仁為末，每服一錢半，溫水調下。」

小兒五十日以來，胎寒腹痛，軀啼弄舌，微熱而驚，此癩疾也。豬腎一具，當歸一兩焙，以清酒一升，煮七合，每以杏仁大與嚙之，日三夜一。 [聖惠方下同](#)

小兒軀啼，驚癩腹滿，大便青白色：用柏子末，溫水調服一錢。

小兒軀啼，面青腹強，是忤客氣：馬糞一團，絞汁灌之。 [聖濟總錄](#)

小兒滿月，百日內發寒啼者，用車前子、元胡索、小茴、豬苓、澤瀉、釣藤各三分，赤茯苓、木通各四分，甘草一分，燈心煎，半饑服。如藥不便，用燈心火爆四花穴，即臍上下左右。 [窮鄉便方](#)

小兒夜啼：「青黛量大小，水研服之。」 [生生編下](#)

[同](#) 小兒夜啼：黑牽牛末一錢，水調傅臍上，即止。

小兒夜啼：用本兒初穿毛衫，安放瓶內，自不哭也。
小兒夜啼，取井邊草私著蓆下，勿令母知。

小兒夜啼：「乳香一錢，燈花七枚，為末」，每服半字，乳汁下。 [聖惠方下同](#)

小兒驚啼：白玉二錢，寒水石半兩，為末，水調塗心下。小兒夜啼，豬屎燒灰淋汁浴兒，并以少許服之。
小兒夜啼，明鏡挂牀腳上，小兒腹痛夜啼，牛黃一豆許，乳汁化服，仍書「田」字於臍下。

小兒夜啼，死人朽棺木燒照即止。

小兒腹痛夜啼，樹孔中草暗著戶上，即止。

小兒夜啼：取雞窠草安蓆下，勿令母知，豬窠中草亦可。

治小兒夜啼寫若以色見我。以音聲求我。是人行邪道。不能見如來。燒灰吞之。男左一本。女右一本。

劉氏方

治小兒夜啼不已，醫所不治者：取狼屎中骨，燒灰為末，水服如黍米大二枚。 千金方下同

治小兒驚啼取雞屎白熬末，以乳服之佳。

又：「酒服亂髮灰。」

又「車轄脂如小豆許，內口中及臍中。」

又：「臘月縛豬繩，燒灰服之。」

小兒夜啼，以妊娠時食飲偏有所思者物，以此哺兒即愈。

又，取伏龍肝、交道中土各一把，治下篩，水和少許飲之。

又，取馬骨燒灰，傅乳上飲，兒啼即止。

小兒驚啼：亂油髮燒研，乳汁或酒服少許，良。

小兒驚啼：啼而不哭，煩也；哭而不啼，躁也：用蟬蛻二七枚，去翅足為末，入硃砂末一字，蜜調與吮之。

活幼口議 小兒驚啼，發歇不定：真麝香一字，

清水調服，日三。 廣利方

小兒夜啼：牛屎一塊，安蓆下，勿令母知。 食

療

小兒夜啼，用涼膈調「益元散」，肚飢臨睡服。 傷

寒心鏡 小兒夜啼，五倍子末，津調填于臍內。

楊起簡便方 小兒夜啼：取燒尸場土置枕邊。

集簡方

小兒一百二十日內夜啼：用蟬蛻四十九箇，去前截，用後截，為末，分四服，釣藤湯調灌之。 心鑑

小兒夜啼：「劉季奴半兩，地龍炒一分，甘草一寸，水煎，灌少許。」 聖濟總錄下同

小兒夜啼：馬蹄末傅乳上飲之。

小兒客忤夜啼：用本家廚下燒殘火柴頭一箇，削平焦處，向上硃砂書云：「撥火杖，撥火杖，天上五雷公，差來作神將，捉住夜啼鬼，打殺不要放。急急如律令。」書畢，勿令人知，安立牀前腳下，男左女右。

峒嶼神書

小兒夜啼，甌帶懸戶上即止。

子母

祕錄下同

小兒驚啼，狀如物刺用。猬皮三寸，燒末，傅乳頭飲兒
小兒夜啼，取伏龍肝末二錢，硃砂一錢，麝香少許，為

末，蜜丸菉豆大，每服五丸，桃符湯下。 普濟方下

同 小兒夜啼：以白花蛇目睛一隻為末，竹瀝調少許灌之。

小兒驚熱，夜臥多啼：硃砂半兩，牛黃一分，為末。每服一字，犀角磨水調下。

小兒夜啼：「硫黃二錢半，鉛丹二兩，研勻瓶固煅過，埋土中七日取出，飯丸黍米大。」每服二丸，冷水下。小兒驚啼：「黃芩、人參等分，為末，每服一字，水飲下。」小兒夜啼：「前胡擣篩，蜜丸小豆大。日服一丸，熟水下至五、六丸，以瘥為度。」

小兒夜啼驚熱：用人耳塞石蓮心、人參各五分，乳香二分，燈花一字，丹砂一分，為末，每薄荷湯下五分。
小兒夜啼：人參一錢半，黃連炙一錢半，薑汁炒、甘草半錢，竹葉二十片，作二服，加薑煎。 [平治會萃](#)

小兒夜啼：用大蟲眼睛一隻，為散，以竹瀝調少許與喫。 [姚和眾方](#)

小兒初生三日內，啼哭，腹內嚮打屁，陰囊稀，名為「盤腸氣。」用車前子、防風各三分，薄荷、甘草各一分，元胡子、木通各四分，蟬殼五隻，水洗去頭足。如脣紅目赤，加宣黃連二分，燈心一丸，同煎服。 [窮鄉便方](#)

小兒夜啼：「蟬蛻二十箇，去頭足，燈花三分，乳香末一錢，竹葉炙過為細末，唾丸入小兒臍，以舊膏藥封之。」 [身經通考方下同](#)

治小兒夜啼用神前燭花，研碎，無根水下。

小兒血眼：兒初生艱難血瘀。眦睛，遂濺滲其睛，不見瞳人，輕則外泡赤腫，上下弦爛。用杏仁二枚，去皮尖，嚼，乳汁三五匙，入輕粉少許，蒸熟，絹包頻點。重者加黃連、硝最良。 [全幼心鑑](#) 小兒百

碎內吐乳，或糞青色：用年少婦人乳汁一盞，入丁香十枚，陳皮去白一錢，石器煎一二十沸，細細與服。

陳文中小兒方

小兒吐乳胃寒者，「白豆寇仁十四箇，砂仁十四箇，生甘草二錢，炙甘草二錢，為末，常摻入兒口中。」

危氏得效方 小兒初生，吐不止者：用籩篠少許，同人乳二合，鹽二粟許煎沸，入牛黃粟許與服。此

《劉五娘方》也。 **外臺祕要下同** 小兒嘔乳不止，服此立效：膩粉一錢鹽豉七粒，去皮研勻，丸麻子

大，每服三丸，藿香湯下。 **活幼口議** 襁褓吐乳咳嗽久不愈：石燕子末，以蜜調少許，塗脣上，日三

五次。 **衛生寶鑑**

小兒初生，二便不通，用皂角燒存性，研為細末，煉蜜

作丸如棗核樣，內穀道中即通。 **育嬰家祕** 小兒初生，大小便不通：用真香油一兩，皮硝少許，同煎

滾，冷定，徐徐灌入口中，服下即通。 **藺氏經驗**

方 小兒初生便閉：甘草、枳殼煨各一錢，水半盞，

煎服。 **全幼心鑑下同**

小兒初生鎖肚，由胎熱毒結於肛門。兒生之後，閉而不通三日者，急令婦人啣兒前後心、手足心，并臍七處四五次，以輕粉半錢，蜜少許，溫水化開，時時與少許，以通為度。

治初生小便不通用孩兒茶研極細末，分許，煎《扁蓄湯》調下，立通。 [萬病回春](#)

治小兒穢惡入腹，令兒嘔吐不乳。木香乾薑茯苓甘草木瓜丁香各等分，水煎，綿蘸滴與之。 [證治準繩](#)

小兒啞嗽，百日欬嗽痰壅：貝母五錢，甘草半生半炙二錢，為末，沙糖丸芡子大，每米飲化下一丸。 [全](#)

[幼心鑑](#) 治小兒百啞內嘔吐乳妳，或大便青色用少婦乳汁一盞，丁香十粒，陳皮一錢，磁器內煮數沸，稍熱，空心以綿毬吮服。 [保嬰撮要](#)

治小兒未啞欬嗽用白殭蠶直者為細末，塗少許妳頭上，令兒喫立效。

《小兒不語》，四五歲不語者：「赤小豆末，酒和傅舌下。」 [千金方](#)

小兒語遲者，以伯勞所踏樹枝鞭之，即速語。李時珍曰：案：羅氏《爾雅翼》云：「《本草》言伯勞所踏樹枝，鞭小兒令速語者，以其當萬物不能鳴時，而獨能鳴之，故以類求之也。」

完素六書

小兒從小至數歲不能言，此心氣不足，舌本無力，不能發轉故也。一云：「風冷傷于少陰。」以赤小豆為末，酒和塗舌上，神效。以社壇餘酢酒，與飲少許。

衛生總微

鍼灸鍼灸

《甲乙經》曰：「小兒臍風，目上插刺絲竹空主之。」

小兒臍風，口不開，善驚，然谷主之。

《千金方》曰：「治小兒四五歲不語，灸足兩踝各三壯。」《聖惠方》曰：「小兒撮口胎風，先灸兩乳中三壯，後用烏驢乳一合，以東引槐枝三寸長，十根，火煨，一頭出津，拭淨浸乳中，取乳滴口中，甚妙。」

黎居士《簡易方》曰：「小兒臍風，獨頭蒜切片安臍上，以艾灸之，口中有蒜氣即止。」

《危氏得效方》曰：「小兒卒然腹皮青黑而死，灸臍上左右，去臍各半寸，并鳩尾骨下一寸，凡五處，各灸

五壯，仍酒和胡粉塗腹上，乾則易。」

《寶鑑》曰：「夜啼，灸幼宮三壯，又灸中指甲後一分。」《萬全方》曰：「灸小兒夜啼，上燈啼，雞鳴止者，灸中指甲後一分，中衝穴一壯，炷如小麥大。」

萬氏《片玉心書》曰：「凡小兒初生，多有灸百會者，取其可以截風也。殊不知地分南北，人有勇怯。北人用灸固宜，南人用之無益而有害也。」

《醫學綱目》曰：「兒生二七日內，不吮乳多啼者，乃客風中膻，循流入脾。灸承漿，在下脣稜下宛宛中。次灸頰車，在耳下頰骨後，炷如雀屎，各七壯，非灸不療。兒喉中嗚咽，乳不利，灸璇璣三壯，在天突下一寸陷者中。」

《古今醫統》曰：「小兒撮口膻風，鍼然谷三分，不宜見血，灸則三壯。然谷，一名龍淵，在足內踝前，起大骨下陷中，又三內踝前，在下一寸，別於太陰躄脈之鄰。足少陰脈所流為榮。」

小兒氣不足，數歲不語，鍼心俞三分，灸則三壯。心俞在五椎下兩旁，相去脊各一寸五分，正坐取之。《衛生總微論方》曰：「小兒心氣不足，從小至數歲不能言，灸心俞三壯，灸兩足踝三壯。」

初生兒血凝。以膻四邊各去膻半寸，并鳩尾下五處，各灸三壯。

治小兒初生撮口，以鹽豉置臍上灸之。

《小兒方》曰：「小兒撮口出白沫，以艾灸口之上下四壯。鯽魚燒研，酒調少許灌之，仍掐手足。兒一歲半，則以魚網洗水灌之。」

《證治準繩》曰：「小兒臍腫，灸腰節臍骨間，灸三壯，名命門穴，炷如麥。」

《東醫寶鑑》曰：「凡小兒七日以上，周年以下，不過七壯，炷如雀屎。」

醫案醫案

《小兒直訣》曰：「李司戶孫百日發搐，日三五次，或作胎驚治之，不應，即用大青膏豆許塗顙，浴體二法，三日而愈。蓋嬰兒血氣未實，不能勝外邪而發搐，故用浴體法。凡搐頻者風在表，易治，宜發散。搐稀者風在臟，難治，宜補脾。」

《獨醒雜誌》曰：樞密孫公抃生數日，患臍風，已不救。家乃盛以盤合，將棄諸江。道遇老嫗曰：「兒可活。」即與俱

歸，以艾炷灸臍下，遂活《保嬰金鏡錄》曰：一小兒印堂青黑，至夜啼搐，余謂脾

土虛寒，用釣藤飲而安。後因驚發搐夜啼，用釣藤飲，前證頓止，又用異功散而愈。

一小兒發熱夜啼，乳食不進，昏迷抽搐，痰盛口噤，脈紋如「水」字，此脾肺氣虛，風木所乘，痰食積於胸腹也，先用「大安丸」，後用六君子加釣藤鉤而痊。

一小兒生旬日，面目青黃，此胎黃證，妊娠胃熱也，用瀉黃散，乳調少許即愈。後復身黃吐舌，仍用前散而安。

《明醫雜著》曰：「一小兒十四歲，肢體倦怠，發熱晡熱，口乾作渴，吐痰如湧，小便淋瀝，或面目赤色，身不欲衣，此稟賦不足也，用補中益氣湯及地黃丸加鹿茸而愈。」

一小兒十三歲，內熱晡熱，形體倦怠，食少作渴，或用清熱等藥治之，虛證悉具。余以為所稟怯弱，用六味丸加鹿茸補之，不越月而痊。蓋古今元氣虛實不同故也。

《幼科發揮》曰：「一兒一日發搐，五日不醒，藥石難入。予鍼其三里、合谷、人中而醒。父母喜，乞調養之。予曰：『曩用鍼時，鍼下無氣，此稟賦不足也。如調理數年後出疹痘，可保無事。若在近年，不敢許』」，次年果以痘疹死。一小兒生後三日，啼哭不乳，予視其證，非臍風，乃臍腹痛也。取蘄艾杵爛，火上烘熱，掩其臍上，以帛勒之，須臾吮乳而不啼矣。

一小兒生八日，噴嚏多啼，請予視。予曰：「此臍風也。」視其上齶，果有泡，色變黃矣。乃取銀窠耳刮

去之。其父慘然，愛惜之心見于形色，故去之未盡也。有老嫗聞之，急使婢女告其父，當急去之。其言迫切，父益懼，自取銀窠耳刮之，不惜也。遣人告予，予曰：「旬日後當發驚風。」後果病。迎予視之，投以至聖保命丹而愈。儒學陶教授一子，生八月病吐，諸醫治之不止，湯丸入口即吐。諸醫云：食入即吐，是有火也。欲作火治，用瀉火藥又不效。眾醫不能治，其吐益劇。既請予至，議治。予作理中湯劑，用獾豬膽汁、童便各半拌之，炒焦以水煎服，藥入立止。師請言其法，予曰：「吐本寒邪，當用理中湯熱藥以止之。內寒已甚，格拒其陽，故熱藥入喉，被寒所拒，不得入也。今膽汁之苦寒，童便之鹹寒，下喉之後，兩寒相得，故不復出。須臾之間，陰氣漸消，陽氣乃發，此熱藥須冷服，以主治格拒之寒，以止嘔噦者是也。」

一兒生二月，忽昏睡不乳。予以日計之，非變蒸也，視有二乳母，皆年少氣壯者，其乳必多，更代與之，必傷乳也。戒以「今且損之，令飢，一日自愈，後宜絕之，只用一乳母可也。」次日果安，父母如其教，亦無傷食病。本縣大尹張鼎石，子生四月無乳，取一民壯婦人乳之，一夜大啼，醫甘大用治之，呼為腹痛，用理中湯不效，又呼為傷食，用益黃散又不效。夜更啼哭，請予視之。甘語其故，蓋心本惡熱，藥中又犯乾薑、丁香，如何不助火而益增其病也。乃往看之。尹曰：「夜啼四日矣。」全曰：「夜啼有四，心煩一也。」尹曰：「傷食乎？腹痛乎？」全曰：「腹痛則面色青，傷食則面多晁白，今面多赤，心煩證的也。」用導赤散加麥冬、燈心，進一服，次早往問之，

甘自內出，云：昨夜到天明不止。予嘆彼喜藥不中病也，不知病退矣。入問尹曰：「昨夜哭尤甚也。」予告之曰：「病安矣。四日夜未乳，昨夜病退思乳，乳母在外。往夜之哭，病哭也；昨夜之哭，飢哭也。」尹喜曰：「怪哉，乳母來後，再不復啼，病果退矣。」

王：「少。」峯次子三個月病吐，請醫治之，藥乳不納。予見其兒在乳母懷中，以身伸努上竄，呃呃作聲，有發驚之意，乃取理中湯丸末子一分，用豬膽汁、童便各半匙調分三服。初一次少停，略以乳喂一二口即止。又進一次又乳之，其兒睡一覺，醒則嘔止，不伸努，不呃呃作聲矣。予以是法教諸子，活人甚多，乃良法也。一兒自滿月後常吐乳，父母愛之，諸醫不能止。一日問予，予曰：「嘔吐者，非常有之病也。今常吐乳，非病也。然孩兒賴乳以生，頻吐乳者，非所宜也，恐傷氣，不可不求其故。有母氣壯乳多者，唯恐兒飢，縱兒飽足，飽則傷胃，所食之乳湧而出，此名溢乳，如瓶之注水滿而溢也，宜損節之，更服肥兒丸。」兒之初生，筋骨軟弱，為乳母者，當懷抱護持可也。不然則左右傾側，其乳流出，此名「吮乳」，如瓶之側，其水流出也。能緊護持，則不吐也。有胃弱者，不能受乳而變化之，無時吐出，所吐不多，此名「哺露」，如瓶之漏，不能容受也，當補其脾胃，助其變化可也。亦以肥兒丸主治。

一女五個月內發搐，予以瀉青丸投之，三四服搐不止轉甚。予思痰壅氣鬱，乃發搐也，丸散頗粗，與痰粘滯于咽喉之間，致氣不通而搐愈甚也。用竹葉煎作

湯，取綿紙濾去其渣滓，澄清服之，搐止而安。其父嘆曰：「醫之貴於變通也，如是夫。」

先翁治一兒，滿月後發搐，以至聖保命丹治之。《安祖訓》治急驚風，只用瀉青丸、導赤散《育嬰家祕》曰：「一小兒初生，遍身無皮，俱是赤肉，用白果粉遍身搽上，候生皮乃止。」

一小兒初生如魚泡。又如水晶。破則水流。用密陀僧研極細搽之。

《保嬰撮要》曰：「一小兒患胎驚，諸藥不應，用紫河車研爛如泥，每用錢許，乳化服之。更以十全大補湯加釣藤鉤、漏蘆與母服，兩月餘舉發漸輕，服年餘舉發漸稀，更服年餘不再發，至出痘後復發。取紫河車研爛，入糯米粉，丸小豆大。每服百丸，以乳送下，服二具全瘥，畢姻又發。仍服前丸及十全大補湯、六味丸加當歸、黃芪、肉桂、五味子。年餘喜其能遠帷幕得瘥，後因勞役更作，又用前丸及十全大補湯等藥不應，用大劑獨參湯服數斤，然後舉發稍緩。乃用人參二兩，附子一錢，數服頓止，仍用前藥，間用獨參湯而瘥。一小兒患胎驚，用紫河車及十全大補湯、釣藤膏而愈。畢姻後發，用大劑獨參湯、六味丸加五味子、黃芪、當歸煎服，半載舉發稍輕，年餘不再發，後每勞役，怒氣仍發，即用前藥隨愈。又傷寒愈後復作，虛證悉具，莫能名狀，用紫河車二具，獨參湯十餘斤而瘥。後患傷風咳嗽，咽乾內熱，用六味地黃丸料加五味子煎服，及十全大補湯而瘥。」

一小兒百日內患抽搐，痰涎自流，用驚風藥益甚，視其面色黃白，仍用六君子、補中益氣二湯而愈。一小兒面青黑或痿黃，審其母素有鬱怒所致，用「加味逍遙散」、加味歸脾湯治其母，其子亦愈。

一小兒月內發搐鼻塞，余以為風邪所傷，以六君子加桔梗、細辛，子母俱服，更以蔥頭七莖，生薑一片，細搗攤帛上，兩掌護溫，貼於額間，半晌鼻利搐止。一小兒未兩月，發搐嘔乳，腹膨作瀉，余以為乳多傷脾胃，用五味異功散加漏蘆，母服之，子服數滴而尋愈。

一小兒旬日內，先兩目發黃，漸及遍身，用「瀉黃散」服之，瘥。

一小兒因母食鬱飽脹，嚙酸而患，遍身皆黃，余以越鞠丸治其母，以瀉黃散治其子，竝愈。一週歲兒痰嗽啼哭，或用抱龍丸未止，余視其右腮白，左腮青，此肺肝二經相勝，先用瀉白散以祛肺邪，次用柴胡梔子散以平肝火，又用地黃丸以滋腎水而瘥。

一小兒三歲夜啼，面色白，黑睛少，小便清，此脾腎氣虛，朝用「補中益氣湯」加山藥、五味子，夕用地黃丸頓愈。

一小兒白睛多，面色赤，時作啼，此稟腎不足，用地黃丸半載後忤其意，雖哭面色不赤。丹溪先生云：「小兒忽大叫必死」，即此義也。

一小兒顛解足軟膝大，不能行履，用六味丸加鹿茸治之，三月而能步履。

一小兒年十四歲而近女色，發熱吐痰，至有室，兩目羞明，頭覺脹大，仍不斷慾，頭漸大，顛門忽開，用地黃丸、益氣湯之類斷色慾，年餘而愈。

一小兒十三歲，患前證，內熱晡熱，形體倦怠，食少作渴，余以為所稟怯弱，用六味丸加鹿茸補之，不越月而痊。

一小兒停食，腹痛夜啼，用「大安丸」而愈。後乳食雖入，其腹仍痛，用六君子加山楂、神麴，痛少止，乃去二味又四劑，痛全止。

一小兒三歲，面白夜啼，小便青而數，此肺腎虛弱，朝用補中益氣湯加肉桂一分，夕用地黃丸而愈。大凡小兒面色青黑睛少，或解顛足熱者，出痘多在腎經，預用地黃丸補腎氣，多得無恙者。

一小兒二歲，夜啼，面色赤，黑睛色淡，小便頻赤，朝用「補中益氣湯加山藥、五味，夕用地黃丸」而愈。

一小兒發熱多啼，乳食不進，昏迷抽搐，痰盛口噤，此脾肺氣虛，風木所乘，痰食積於胸腹也，先用「大安丸」，後用六君子、釣藤鉤而痊。

一小兒每忽哭，白睛多，每悲，面色赤，余謂「稟賦腎虛，火妄動而然也」，用地黃丸，半載後，雖哭而面色不赤，諸證皆愈。

一小兒停食腹痛，發熱嘔吐，服峻厲之劑，更吐瀉汗多，手足並冷，發瘧不止，其脈決浮，按之如絲，用六君子湯加升麻、炮薑，瘧證頓已。惟寒熱往來，又用四君、升麻、柴胡而愈。

一、小兒瘈。瘈啼叫額間青黑，此驚風肝木乘脾，腹中作痛也，先用六君子湯加木香、柴胡、釣藤鉤，啼叫漸緩，更加當歸，又二劑而安。

「一小兒言遲泄瀉，聲音不亮，雜用分利清熱等劑，喉音如瘈，飲食少思，朝用地黃丸加五味子，夕用補中益氣湯，其瀉漸止，遂專服前丸兩月，喉音漸響。」
一小兒白睛多瀉，後喉瘖口渴兼吐，大便不實，朝夕服地黃丸而瘖。後患瀉，喉復瘖，仍服前丸而愈。此皆

稟賦腎氣不足，故用是藥一小兒五歲不能言，咸以為廢人矣。但見其形色悉

屬肺腎不足，遂用六味地黃丸加五味子、鹿茸，及補中益氣湯加五味子。兩月餘形氣漸健，將半載能發一二言，至年許始音聲如常。



本作品在全世界都属于[公有领域](#)，因为作者逝世已经超过100年，并且于1929年1月1日之前出版。



本作品原文沒有標點。標點是人工智能程序[古詩文斷句 v2.1](#)創建，並且經由維基文庫用戶編輯改善的。本站用戶之編輯以[知識共享 署名-相同方式共享 4.0 协议 \(CC BY-SA 4.0\)](#) 發佈。



歡迎各位持續修正標點，請勿複製與本站[版權協議](#)不兼容的標點創作。

About this digital edition

This e-book comes from the online library [Wikisource](#)^[1]. This multilingual digital library, built by volunteers, is committed to developing a free accessible collection of publications of every kind: novels, poems, magazines, letters...

We distribute our books for free, starting from works not copyrighted or published under a free license. You are free to use our e-books for any purpose (including commercial exploitation), under the terms of the [Creative Commons Attribution-ShareAlike 3.0 Unported](#)^[2] license or, at your choice, those of the [GNU FDL](#)^[3].

Wikisource is constantly looking for new members. During the realization of this book, it's possible that we made some errors. You can report them at [this page](#)^[4].

The following users contributed to this book:

- Kwj2772
- Jdx
- 維基小霸王
- Rocket000
- Santoposmoderno
- HereToHelp

- Victormoz
- Srittau
- Boris23
- KABALINI
- Bromskloss
- Tene~commonswiki
- AzaToth
- Bender235
- PatríciaR
- Dbenbenn

-
1. [↑ https://wikisource.org](https://wikisource.org)
 2. [↑ https://www.creativecommons.org/licenses/by-sa/3.0](https://www.creativecommons.org/licenses/by-sa/3.0)
 3. [↑ https://www.gnu.org/copyleft/fdl.html](https://www.gnu.org/copyleft/fdl.html)
 4. [↑ https://wikisource.org/wiki/Wikisource:Scriptorium](https://wikisource.org/wiki/Wikisource:Scriptorium)